

Carnaval 47

CU POPO Y SKRIBIDI

Chicho Kock cu tumba ganador 2001 “Si e sapato sirbie bistie”

GENERACION NOBO TABATA FORMIDABLE

POPO a gusta masha hopi e prome concurso di tumba di e milenio aki cu e generacion nobo. Nan a demostra cu pa e añanan venidero, mescla cu e veteranonan cu ainda ta activo, Aruba lo haya tumbanan di nivel y grandi. POPO a keda satisfecho cu e publico cu POPO a mira, ya cu e expectativa segun tur e rumornan cu a circulo tabata cu lo tin menos publico, sinembargo el a resulta kizas mas cu aña pasa. Chicho Kock sigur a dal fuerte e anochi aki, y Cachete a sorprende cu su “Cayente” prepara den 10 minuut, y cu improvisacion di trompetnan y trombon na ultimo ora, y cu un ensayo, pa pega asina fuerte. E damanan tambe a impresionar POPO masha hopi y POPO a keda contento di mira varios di nan den e 10 mihor di e anochi.

COMIENZO BUNITA

Banda Tio Juan a habri e anochi cu un SOLAIKA ALDERS cu POPO ta pronostica di awor caba como un probable reina di tumba den futuro. E tin bon voz pa tumba y a duna bon show cu su zak zak zak abao y e “kick” na final cu “hisa bo man”. POPO a goza su Hisa man y Zwaai E. Tene bista riba e hoben aki den futuro.

Di grupo Amistad, ISIDRO MADURO un biaha mas a demostra cu e ta un veterano versa den su tumba cu su Subi Caya Celebra. E no a clasifica, sinembargo ta agradable pa mire riba escenario cu masha bon presentacion di tumba. Otro cantante cu tabata bon riba escenario cu su trahe carnavalesco masha bunita mes tabata EDSELIN CROES cu a



presenta cu Coco Loco Band. Prome cu el a subi escenario POPO a ripara cu e tabata poco nervioso, y a bin haya sa cu e tabata duda den corda tur palabra debi na e poco ensayo. Sinembargo el a duna un show masha aceptable cu su Hey Hey Carnaval.

DIDI WERNET tambe ta presenta fuerte na principio di e programa du Coco Loco Band cu su “Den tobo di laba paña”. E ex rey, veterano activo ainda no a convence hurado, sinembargo, lo sigui busca e otro corona.

MUSICAL TIME Y SENSACION

Musical Time a habri acompañando NICOLE DE KORT. POPO a goza e hoben yen di pep aki. Nicole a duna bon presentacion cu su Bahul di fantasia. Bisti tambe cu su trahe carnavalesco el a move bon riba escenario y tambe ta un prospecto pa futuro y por bira un favorita.

Encanta POPO a keda cu e trahe di piñata di DJANIRA

RASMIJN KOCK, kende a canta su Piñata. Su trahe so a demostra kico tin den e piñata. E tabata fuerte cu su “dale un palo aki, dal e otro banda”.



publico y fanaticonan.

E veterana leyenda BERNADINA GROVELL tabata tin publico riba su man cu su “Celebre”. Esaki ta e unico resultado cu a sorprende POPO cu a kere cu Bernadina lo ta entre e ganadornan, sinembargo, pa e huradonan e no a resulta suficiente fuerte pa termina entre e mihor cinco di e anochi y a ocupa di 6 lugar. BERNADINA ta keda Bernadina di TUR HENDE. Mescos cu Bernadina, ANDRES TROMP a presenta cu Sensacion Original cu Drenta Aden, pero no por a impresionar. El a bin tambe bon bisti cu su trahe carnavalesco y composicion y arreglo di Martin Quandus.

BRISAS BANDA SHOW A DUNA BRISA

Brisas Banda Show a duna e publico un presentacion a la “Ladies Night” cu su cuatro cantantenan femenino cu a bria riba escenario. ANALIA RASMIJN a haci su debut den e grandinan di tumba cu bon canto y movecion y mescos cu el a expresa “carnaval mi ta mirabo” por a mira un Analia cu cabey spina modernamente hubenil gosando di su anochi. E tambe ta un pa tene cuenta cune.

E cantante di Brisas cu sigur a merece di tabata entre e finalistanan tabata EMILENNE BOEKHOUDT cu su Papa k’e lenso. Emilenne tambe cu su trahe carnavalesco estilo

harlekin tabata tin un birada masha bunita a la cha cha cha den su tumba, y esey a impacta hopi. Emilenne a termina entre e ganadornan na di 5 lugar.

JELISSE BOEKHOUDT, tambe a presenta hopi bon bisti manera bailarina di flamenco-gitano cu su Bisami Spiel Bisami. Riba escenario e tabata tin su spiel grandi cu su asistentenan a pone mucho na su man robez, pero su coro a pronk cu nan spiel den man. Jelisje no a clasifica entre e 10 nan.

E ultimo cantante di Brisas tabata LIVETTE RICHARDSON cu POPO ta mira tambe como un prospecto grandi pa futuro. El a presenta sexy na preto cu su shorts y boots y a move hopi bon. Tene bista riba Livette pa futuro.

EQO EXITANTE BANDA MAS FUERTE

E banda musical cu a zona mas fuerte e anochi aki, y como banda mester tabata tin cantante den finalistanan, tabata EQO Exitante. POPO a goza e banda aki un mundo e anochi aki.

Na momento di acompaña ELTON KELLY, e piano a carga e tumba Campaña y Elton riba escenario tabata manera un gigante y POPO ta mira cu lo no dura mucho cu e lo cobra su prome corona grandi. Otro cu ta goza di hopi popularidad, y cu den futuro un dia lo por bay cu e corona ta JERRINO RIDDERSTAP cu e anochi aki a canta “Den gallop” un composicion cu arreglo tambe di Martin Quandus. E no tabata mucho fuerte.

Pisa tabata “Si e sapato sirbi bisti’e” di CHICHO KOCK. Aki por a haya e impresion caba cu esaki ta e tumba cu mester wordo gana e anochi aki. Di tur comentario cu POPO a tende prome cu resultado, por bisa cu casi tur tabata den direccion di CHICHO como posibel ganador y el a bin gana tambe su di tres titulo di REY DI TUMBA.

Otro cancion den cual e piano a carga e tumba hopi bon tabata di RAMPHIS TROMP cu “Chelita stret’e”. E no a resulta un tumba pa por gana esun di Chicho, pero si tabata candidato fuerte pa premiacion, y a termina tambe na di cuatro lugar.



Carnaval 41

CU POPO Y SKRIBIDI

DREAM NO TABATA "E DREAM"

Despues di EQO, ORIGINAL BAND a acompaña DANNY KOOLMAN. POPO a goza e Palo di wiri cu su wiki wiki masha hopi y tabata tin Danny como un di e finalistanan si no tin mihornan pa pasa riba dje den punto. Danny ta un di e prospectonan tambe pa corona den futuro, y e anochi aki a termina na di 7 lugar. Cuidao cune den e dos pa 3 añanan nos dilanti.

POPO no a haya cu e DREAM cu a presenta cu tres cantante den e concurso tabata "E DREAM" fuerte cu POPO siempre a conoce. DREAM tabata falta algo e anochi, y no a zona fuerte manera POPO ta custumbra di dje. QURVIN DANIA a haci bon papel cu su tumba "bay cu e mop", sinembargo no tabata un compositor ganador. POPO a goza JEFFREY LA ROSA aunke e no tabata tin un tumba ganador tampoco cu su "trece bek den carnaval".

RODNEY BESSELINK tambe tabata tin un tumba bon presenta di Martin Quandus, "Mi primo". E anochi aki no tabata anochi di Rodney tampoco, aunke mester admiti cu POPO a gusta e manera cu e tabata dirigi e orquesta.

SORPRESA DI E ANOCHI CU WMT-XL

E sorpresa di e anochi a cay cu W.M.T.- X.L. Nan a habri cu MIRIAM CONTRERAS cu no tabata tin un tumba fuerte cu su "Lague cos cera", pa bisa cu e lo por clasifica. POPO sinembargo ta kere cu Miriam lo por bira un di e atraccionnan pa futuro tambe si e sigui, pasobra e "tin tur cos" pa mehora hopi. JAIRO EVERTSZ manera custumber ta un cantante bon y bon prospecto pa e corona. Jairo a zona bon cu su "Carnaval su corazon". Su tumba realmente a zona bunita

y tabata un di e candidatonan fuerte pa e mihornan di e anochi, pero no suficiente fuerte pa tumba Chicho. Jairo a termina sinembargo na di 9 lugar.

E sorpresa grandi tabata ROY LINTZ, Lord CACHETE cu a sorprende tur hende cu su habilidad di tumba. Tur hende a conoce Cachete semper pa su calypso y su roadmarch, pero e anochi aki, el a sorprende tur hende y demostra cu tumba tambe ta den su sanger.

Roy a presenta e tumba "cayente" cua wordo componi y aregla pa "nos mes cu nos mes". Un tumba cu WMT-XL y Roy a hinca den otro den diez minuut, djies pa un presentacion cu humor y e participacion. E tabata un tumba cu e ritmo so y na ultimo momento a hinca aden e instrumentonan di blaas cu un areglo simpel pa yuda carga e ritmo cu su toque di tambu moderno. Si e wiri den e cancion aki tabata un chapi (den man di Etty Toppenberg por ehemplo) e tumba lo a zona manera strenna e anochi aki. E biradanan, e fantasia musical a yuda hopi pa pone "Cayente" entre e ganadornan, y el a bin resulta tambe e unico tumba cu despues di Chicho a move e publico bon.

Cachete a logra bay cas cu su prome trofeo di tumba. Kizas e por percura pa e prome MILAGER di Carnaval, ganando corona di rey di calypso, rey di roadmarch y rey di tumba den futuro.

CANDIDATA PA REINA NA CAMINDA

Por poco casi mitar di e participantenan e anochi aki tabata cantantenan femenino. Di e 29 cantantenan 11 tabata hende muher, y e prome Reina di tumba no ta leeuw. un cu a yega cerca ayera anochi cu su trahe carnavalesco masha bunita tambe tabata EDSELINE FIGAROA cu den tur concurso y festival ta un di e favoritnan tambe di POPO. For di

momento cu Edselin a presenta backstage, y tabata concentrando pa su presentacion, por a nota cu e lo subi escenario cu e tranquilidad di custumber y duna lo mihor. EDSELINE ta e cantante mas cerca di e corona cerca e damanan y den futuro lo tin cu lucha fuerte cu e otro candidatonan cu lo busca e FIRST aki. Su "Carnaval ta yen di rol" a pega bon y tabata merece un lugar di honor, y el a termina tambe na di 3 lugar den e concurso.

BOYSIE CU PRESENTACION DI "AYO"

Boysie Croes semper tabata un atraccion, pero durante e anochi aki, POPO ripara cu Boysie no tabata BOYSIE CROES y e reaccion di publico tambe a indica igual. Pa e concurso di tumba, POPO lo kier mira BOYSIE cu un BON ORQUESTA otro aña, un tumba pisa y duna asina su presentacion DI DESPEDIDA di e concurso den cual semper su nomber lo keda menciona. POPO ta bisa esaki, pasobra Boysie tin su nomber graba caba den e concurso aki y e no por contra e hubentud cu ta subiando y e cambianan cu ta manifestando su mes den e concurso. Su cancion "mi kier bira choller" tabata humoristico cu algun di e verdadnan di custumber cu e sa canta, pero un tumba criollo no clasificador, sinembargo agradable pa scucha.

ZODIAC a habri pisa cu e cancion "Señorita ta manda" como warmup y tabata tin publico den movecion for di principio te final di e warmup. E espectativa tabata cu EDWIN GOMEZ lo duna un show mes fuerte, sinembargo su tumba no a logra pega. "E paharito di carnaval no a clasifica".

TAPIJT CORRA COLOR MARON

E red carpet di ASOMA riba anochi di tumba no a resulta local a spera. Henter e espacio reserva tabata tin solamente 3 pareha den dje y sigur ta cu nan a goza sin ningun hende pa molestia nan. Si otro biaha no bini cu e red carpet, por siquiera bini cu un espacio elite caminda e publico eyden lo paga poco mas pa ta te dilanti pasobra e separacion a haci impacto sigur riba e ambiente e anochi aki. E espacio por wordo bendi na gruponan di fanaticonan di cierto cantantenan unda nan lo ta hunto na lugar di plama for di otro pa animacion.



Celebra Carnaval cu seguridad pa bo cas contra ladron. Seguridad pa porta, ventana y slidingdoors.

- scharnier contra ladron
- veiligheidsbeslag
- veiligheidsclinder
- veiligheidsluitkom
- veiligheidsloten
- secustrip
- oplegsloten y hopi mas.

ARUBA N.V.
Druiwenstraat 8 - Tel: 823194

Nos horario 8.00 - 17.30 ora Non-Stop.
Diasabra 8.30 - 13.00 ora.